

# Qalam

Bilangan 33 – 1 April 1953 - Rejab 1372 – 60 sen

## BAHAYA DI HADAPAN KITA

Di dalam masa pancaroba yang hebat yang kita hadapi hari ini maka banyak anasir-anasir yang mengambil peluang untuk mempengaruhi orang-orang kita sama ada dengan secara tepat atau secara berselindung di sebalik batang taubat orang-orang kita yang boleh digunakan oleh mereka itu untuk merosakkan kedudukan dan nama baik ajaran-ajaran yang dibawa oleh junjungan kita Muhammad (SAW) yang ketibaannya adalah membawa akhlak dan budi pekerti yang mulia.

Di dalam masa pancaroba ini kita melihat bermacam-macam cara dan bermacam-macam kaedah telah dijalankan oleh mereka, ada dengan jalan mempengaruhi dan ada pula dengan jalan mengambil peluang-peluang melengahkan orang-orang kita kepada tunjuk ajar yang dijalankan oleh mereka untuk merosakkan pergaulan dan akhlak yang baik kepada pergaulan yang mengikut hawa nafsu yang membawa kecelakaan kemudiannya.

Anak-anak kita telah berduyun-duyun terbawa atau dibawa oleh alun yang kuat itu dan dari semasa ke semasa mereka itu menjadi pengikut-pengikut yang taat dan membabi buta dengan tidak lagi mengambil endah kepada tunjuk ajar yang memandu mereka itu kepada akhlak yang mulia itu. Mereka itu telah jadi umpama layang-layang lepas daripada talinya terawang-awang sehingga melupakan kepada kedudukan dan keadaan diri mereka sendiri dan kepada kudrat yang menjadikan mereka bahkan mereka itu telah mencapak dan mencela kepada pengajaran-pengajaran yang boleh mengenalkan mereka itu kepada yang menjadikan mereka.

Hal yang demikian berjalan terus mara dari satu

tapak ke satu tapak dan kemaraan mereka kita pandang dan kita lihat dan seolah-olahnya kita tidak mengambil endah kepada kejadian-kejadian itu. Kita seolah-olah tidak mempunyai tanggungjawab kepada kejadian itu dan seolah-olah kita tidak gentar bahawa anak-anak kita itu bukan sahaja telah menjadi pencapak kepada ajaran-ajaran agama kita bahkan ada di antara mereka itu yang telah membelakangkan langsung dan menjadi orang yang “tidak bertuhan”.

Di manakah kesalahannya ini? Jawabnya tentulah menepati benar sebagaimana yang dipesan oleh al-Khalifah ‘Umar Ibnu al-Khaṭṭāb bahawa “ajarlah anak-anak kamu itu dengan pengajaran yang bukan untuk masa kamu tetapi untuk masa yang akan datang.”

Sudahkah kita mengikut pesan yang demikian ini? Sudahkah kita melihat dan mencagarkan suatu dasar yang akan ditempuh oleh anak-anak kita pada masa yang akan datang? Jawabnya sebaliknya! Orang-orang kita mengambil pengajaran kepada perkara-perkara yang telah lalu, kedudukan-kedudukan yang telah lalu iaitu mengadap ke belakang sedang sesiapa yang mengadap ke hadapan akan mendapat celaan yang hebat. Biarlah umpamanya mereka itu mengadap ke belakang, tetapi hendaklah mereka bekerja kerananya. Keadaan yang kita lihat pun di dalam perkara ini tidak sampai kepada tujuan yang tersebut.

Di dalam masa umat sekarang berhajat kepada penerangan-penerangan agama yang jelas dan terang maka boleh dikata tidak ada orang-orang kita di sini yang mahu ke tengah memberi penerangan-penerangan dan penjelasan-penjelasan kepada anak-anak kita yang menghadapi bayang-bayang kesesatan itu. Tidak ada di antara kita yang mahu menggunakan masanya untuk membuat kitab-kitab yang bersesuaian dengan keadaan masa dan jiwa kanak-kanak bagi masa ke hadapan kerana mereka itu tengah asyik membuka dan mentelaah kitab-kitab yang tertimbun-timbun lalu melupakan kewajipan kepada perkara yang kecil-kecil kerana mereka hanya memandang kepada perkara-perkara yang besar sahaja.

Kita hari ini berkehendak kepada kitab-kitab pengajaran

agama yang berguna untuk memandu anak-anak kita di dalam keadaan yang sempurna dan terang tidak di dalam keadaan yang teraba-raba sebagaimana hari ini. Kita sendiri telah berikhtiar meminta seorang berdua menyempurnakan penerangan-penerangan yang sebegitu dikehendaki tetapi tidak ada seorang pun yang ke tengah menyertai tujuan dan maksud itu. Dengan keadaan yang demikian ini bolehkah kita menyelamatkan anak-anak kita daripada pancaroba yang menimpa kita? Ingatlah bahawa ini suatu tanggungan yang besar kepada kita!

Kita sekarang berhajat kepada ulama-ulama kita ke tengah untuk memimpin dan memandu anak-anak kita supaya tidak tercebur ke dalam lembah yang ditakuti itu. Kita menghendaki mereka bekerja kepada cita-cita yang dimaksud itu. Kita menghendaki seberapa banyak kitab-kitab pengajaran agama bagi panduan mereka supaya jangan tercebur ke dalam jurang yang akan mencelakakan mereka itu kemudian.

Mudah-mudahan ada keinsafan di antara kita untuk menggalang ganti bagi menyelamatkan mereka itu daripada tercebur ke dalam marabahaya yang berjalan dari setapak ke setapak dengan derasnya sedang kita tidak mengambil endah dan seolah-olah tidak mengambil peduli ke atas perkara itu adanya.

\*

## HARAPAN TUNGGAL

Baharu-baharu ini jawatankuasa pusat penaja kolej Islam se-Malaya telah mengadakan perjumpaan ramah tamah dengan wakil-wakil akhbar Melayu tempatan di rumah pengurus jawatankuasa tersebut di Singapura, iaitu dengan maksud hendak mendapatkan kerjasama akhbar-akhbar itu bagi menjayakan penubuhan dan terlancarnya perjalanan kolej Islam se-Malaya, yang sudah dua tahun dirancangkan, tetapi masih lagi terpendam dalam alam ghaib.

Mengadakan kolej Islam dan menjalankannya sekarang ini juga itulah sahaja harapan tunggal bagi Islam hidup bersemarak di negeri kita ini pada pandangan kita

bahawa kiranya terbantut dan terbengkalai penubuhan kolej Islam itu – barang dijauhkan Allah – maka agama suci yang kita cintai itu sudah tetap akan menjadi ibarat benda buruk yang dihormati, tetapi tiada dikehendaki dan tiada berguna. Kita yakin bahawa orang-orang Islam di negeri ini tidak suka melihat nasib agama mereka menjadi demikian rupa, tetapi kalau hanya tak suka melihat hal itu pada hal tidak mahu berikhtiar bagaimana hendak mengelakkan bahaya tersebut, maka “tak suka” itu, tiada akan mengubahkan keadaan.

Sayoga diketahui bahawa agama kita istimewa agama Islam adalah suatu kepercayaan yang bukan tumbuh dengan sendirinya seperti cendawan di musim hujan, malahan berkehendakkan pusat yang daripadanya terbit segala usaha dan ikhtia bagi menyemai dan membaca kepercayaan itu, maka kolej Islam itulah pusat yang akan memberikan tenaga hidup agama Islam di negeri ini. Yang demikian itu adalah menjadi kewajipan tiap-tiap seorang muslim di negeri ini, dari pihak raja-raja dan pembesar-pembesar hingga kepada rakyat jelata memberikan sebarang apa juu sokongan dan bantuan yang terdaya oleh masing-masing kepada penubuhan kolej itu. Kewajipan ini tidak boleh dicuai-cuaikan atau diringan-ringankan oleh seorang muslim yang mengaku beriman kepada Allah dan beragamakan Islam.

Harus ada di antara orang-orang kita yang hanya berfikir secara kebendaan yang akan berkata bahawa kolej itu tidak perlu dan tidak mustahak kerana hajat kita kepada pegawai-pegawai agama seperti mufti dan kadi-kadi, tidaklah besar atau banyak bilangannya yang dikehendaki. Kepada orang-orang seumpama ini, kita suka menegaskan bahawa tujuan pelajaran dan didikan bukanlah untuk mencari kerja atau menyediakan pegawai-pegawai kerajaan. Kiranya tujuan pelajaran dihalakan ke situ nescaya tak perlulah di dalam sesebuah negeri itu diadakan berbilang-bilang universiti, kerana memadailah sebuah universiti bagi mengeluarkan pegawai-pegawai yang dikehendaki (sambungan pada muka 43)